

Forord

For eit fagmiljø som kallar seg *Institutt for religion, livssyn og kyrkjefag*, og som held til ved Høgskulen i Volda, er det naturleg, nærast ei plikt, å forske på det som går føre seg av kulturelle og religiøse endringar i regionen. Denne boka er eit resultat av denne interessa.

Det regionale aspektet er ramma kring arbeidet. Vi har sett søkjelyset på det særleine ved kristendomen på Vestlandet, og særleg på Nordvestlandet, historisk så vel som aktuelt. Populære framstillingar har forma eit klisjeaktig bilete av Vestlandsfanden som det er grunn til å sjå på med forskarblikk.

Eit nasjonalt perspektiv høyrer sjølv sagt med, som eit bakteppe. Det vi finn som særdrag ved Vestlandet, må vi sjå i samanheng med viktige trekk ved den nasjonale utviklinga i nyare tid, knytte til stikkord som individualisering, demokratisering og pluralisering.

Når vi studerer kulturelle og religiøse endringar i eit regionalt perspektiv, er det historiske viktig. Er det særleine meir eller mindre tydeleg no enn tidlegare? For å nærme oss eit svar på det spørsmålet er vi også avhengige av eit aktuelt aspekt. Kva har til dømes teknologisk utvikling, velferdsstat og innvandring gjort med vestnorsk religiøsitet?

Nokre av artiklane er ikkje skrivne i eit spesifikt vestnorsk perspektiv, men er likevel rekna som relevante og fortener plass i antologien. Ein god grunn for at Torrey Seland og Ottar Berge er med, er at dei i mange år har vore kollegaer med førstelektor Bente Mari Afset. I tre tiår har ho vore ved Høgskulen i Volda, som ein dyktig, humørfylt og gledespreiande lærar, og i mange år har ho administrert instituttet med kjærleg mynde. No fyller ho 65 år, og alle forfattarane i boka gratulerer i stor takksemd.

Volda, februar 2020

Birger Løvlie, Per Halse og Kristin Hatlebrekke

Redaktørar

